



Selasa, 04 Juni 2024

Ogen : Markus 10:13-16



**Ndakep Anak**



**M**ichael anak si nguda, telu ia sembuyak, dua dilaki ras sada turangna. Tangtangna ia tubuh sehkal jilena, kulitna mbentar, bukna lit pergara-garana, tempa-tempa anak kalak barat. Ban ngena-ngena ate kitik-kitik nari rusur ia itokoh-tokohi (cakap jagar), ngatakenca maka ia anak kalak barat si dat-dat i pantai. Kedungenna Michael mbelin alu maba akar pagit i bas pusuhna. La ia nggit pulung-pulung ras keluarga. Padin akapna ras teman-temanna, tempa-tempa rusur la alokenna kekelengen i bas jabu e nari. La isedari keluargana, maka i bas pusuh Michael e dem rawa, erkiteken perkatan si nai ibelasken alu jagar e. Sada paksa kenca erjabu, i bas sada natal keluarga. I je ngaku ia maka sedekah enda kitik ukurna, e sierbanca iakapna sedekah enda ia la ikelengi. Kenca ia sialem-alemen, sidakepen ia kerina. Kenca si e ietehna maka ukurna e la payo, janah enggo ia ngasup nggejabken maka tuhu-tuhu ia ikelengi.

Megati kisah si bage jadi i bas jabu-jabu. Main-main berujung sakit hati. E maka perlu kal kita rusur erlajar Bahasa keleng ate. Mawen kebutuhen e la terjeng soal duit, pemere tapi pe soal pengerana ras perbahanen. Lit pe bahasa keleng ate si berupa dakepen hangat guna mpeteneng ukur. Nina Yesus, "*Pelepas anak-anak e reh ndahi Aku.*" Jenari idakepiNa anak-anak e. Yesus ngajari kita maka kata-kata banci jadi la cukup guna mpeangkaken man anak-anak e maka ia ikelengi. I bas paksa kata-kata la cukup, i je me dakepen e nuduhken uga bagesna kekelengen e. Dakeplah rusur anakta, jadikan tan ras barandu jadi inganna ngamparken babanna si mberat.

☞ *Sada dakepen nuriken meribu-ribu kekelengen*